


Lassanhammers f 0,30.

September 1936.

No. 24.

Taon ka 3.



SAM KAUW GWAT PO

Orgaan dari Batavia Buddhist Association Sam Kauw Hwe Batavia
Menado dan Telokbetong.

ARTIKEL SPECIAAL DALEMINI NUMMER:

Tjonto dan Toe!adan dari pergerakan Tionghoa-Islam di Makassar.

Mentjari Katentreman Hidoep (bagian kadoea) oleh Kwee Tek Hoaij.

Lezing Khong Kauw jang penting di Batoeretno oleh Auw Ing Klong.

Pakerdja'an Sam Kauw Hwe Menado.

Menoeroet verslag dari Bestuur Sam Kauw Hwe Menado, pergerakan disana ada berdjalan dengan tetep dan perhatiannja publiek tida berobah.

Lezing-lezing tentang Sam Kauw boekan sadja diadaken oentoek orang-orang dewasa tapi djoega satiap minggoe speciaal dibikin oentoek anak-anak

Di sabelah ini ada dimoeat doea foto koetika dibikin itoe lezing oentoek anak-anak pada tanggal 25 April 1936.

Gambar kasatoe mengasih liat sakoempoelan anak-anak jang aken hadlirin itoe lezing dengen Bestuur S. K. H. berdiri di blakangnya. Ini foto diambil di moeka krenteng Ban Hin Kiong.

Gambar kedoea mengasih liat bagian blakang dari itoe krenteng dimana Bestuur S. K. H. biasa mengadaken lezing.

Iai doea foto, kiriman Toean Oeij Pek Yong, kita moeatken dengen girang dalem ini halaman, dan boeat itoe kiriman kita hatoerken banjak trima kasih.

Lebih djaoe kita harep sekalian S. K. H. dan laen-laen pakoempoelan kabatinan Tionghoa jang satoe toedjoean, nanti soeka kirim foto-foto dari pertemoean, karaja'an dan laen-laen. Kapan dirasa ada harganja kita nanti bikin cliche aken dimoeat dalem ini halaman dengen bergiliran, soepaja satoe sama laen bisa taoe di masing-masing tempat poenja gerakan.

SOEDAH SEDIA


Sam Kauw Gwat Po dari № 1 sampe № 12, jang soedah didjilid mendjadi satoe dengen pake carton tebel, harga f. 3,60 dikirim franco aangeteekend.

Harga per djilid terlepas f. 0,30, boleh dapat segala roepa nomor jang soedah terbit.

Dengen poenjaken *Sam Kauw Gwat Po* dari № 1 orang bisa dapat taoe gerakan Sam Kauw dan lezing-lezing kabatinan dari bermoeolah sampe sekarang.

Sam Kauw Hwe Menado.


Lezing minggoean oentoek anak-anak.



•Bagian moeka dari krenteng Ban Hin Kiong sabelonna itoe
lezing dibikin.

Sam Kauw Hwe Menado.

Lezing minggoean oentoek anak-anak.



Bagian belakang dari krenteng Ban Hin Kiong koetika moelak diadaken lezing.

Sam Kauw Gwat Po.

三 教 月 刊

ORGAN DARI BATAVIA BUDDHIST ASSOCIATION,
SAM KAUW HWE BATAVIA, MENADO
DAN TELOKBETONG.

ISINJA INI MAANDBLAAD ADA DIOEROES DAN DITANG-
GOENG OLEH REDACTIE „MOESTIKA DHARMA.”

Harga abonnement per kwartaal f 0,75. Pembajaran dimoeka.
Kalo berlanggan dirangkep sama Moestika Dharma atawa
Moestika Romans, boeat ini maandblad tjoemah tambah per
kwartaal f 0,50. Harga advertentie boleh berdami.

Kantoor Redactie Administratie: Tjitjoeroeg, Preanger.

Tjonto dan Toeladan.

Jang kaoem Kristen Tionghoa ada bekerdja dengen
giat dalem kalangan bangsanja itoelah semoea orang
soedah taoe. Boekan sadja pendita-penditanja, hanja
orang-orang Tionghoa Kristen biasa poen bantoe
berdaja aken bikin propaganda, baek dengen adjakin
orang-orang bangsanja dateng denger chotbah di
gredja, atawa poen tjeritaken kabaekannja itoe agama
pada orang-orang jang soeka denger, hingga agama
Kristen maskipoen dengen perlakan selaloe madjoe
dengen tetep antara bangsa Tionghoa, apalagi sadari
moentjoel gerakan dari Pinkster Gemeente dan Pinkster
Beweging jang soedah dapat banjak penganoet.

Orang Tionghoa di Indonesia jang beragama Islam,
maski tida boleh dibilang sedikit, tida ada begitoe
besar djoemblahnja seperti jang masoek Kristen.
Marika poenja gerakan tida banjak kadengeran sebab
tergaboeng dengen pergerakan kaoem Moeslimin
saoemoemnja. Tapi belon lama kita ada batja satoe
kabarau dalem *Pembrita Makassar* tentang pergerakan

kaoem Tionghoa Islam di Makassar, jang boeninja seperti berikoet:

PARTIJ TIONGHOA ISLAM INDONESIA DI MAKASSAR.

Menilik ka'ada'an sekarang kalangan P. T. I. I. (Partij Tionghoa Islam Indonesia) kapan maoe di bandingken, sewaktoe taon 1933, ada amat djaoe perbeda'annya,

Boekan sadja kita sendiri menaro perhatian pada itoe Partij Igama malah kabarnja terdapat banjak di antaranja golongan orang-orang jang terkenal namamanja dalem pergaoelan dari bangsa kita, jang perna menjaksiken perobahan dari ka'ada'annya P. T. I. I. serta kamadjoeannja.

Dari fihak bestuurnja kita dapet kabar jang pada bebrapa boelan berselang, P. T. I. I. telah memperloeaskun soesoenan bestuurnja, dengen mengadaken badan bestuur dari golongan Prampoean dan soesoenan bestuur P. T. I. I. ada feratoer dalem doeafdeeling seperti berikoet:

Afdeeling lelaki :

Voorzitter : Baba Bidol.

Vice Voorzitter : Sie Hok Keng.

Secretaris dan Penningmeester : Tjia Goan Lien.

Commissarissen : Oei Teng Hoei dan Oei Tiang Kioe.

Propagandist : Hasan Kwee.

Directeur : Tjia Leang Giok.

Jang mendjadi Goeroe dari afdeeling lelaki, jalah : Sech Ali Qoeddoes, Moh. Akib dan Hadji Abd. Rachman Dg. Sitoedjoe.

Afdeeling prampoean :

Voorzitter : Njonja Lie Kiao Tjoe.

Vice Voorzitter : Njonja Thoeng Tjen Ting.

TJONTO DAN TOELADAN.

Secretaresse dan Penningmeesteresse : Njonja Thoeng Oang King.

Commissaressen : Nona Oei Heang Tjoe, Nona Ong Soang Soeng, Njonja Thoeng Tjoe Nio, Njonja Nio Djie Ien.

Propagandisten : Njonja Ang Kiok Tjong, Njonja Oei Soei Lie.

Samentara jang mendjadi goeroe boeat afdeeling prampean jalal Njonja voorzitter dari perhimpoenan Aisiah groep Kampong Pisang, Njonja „Oemmi Lalang“, dengen dibantoe oleh moerid-moeridnya Kaoem Poetri-poetri jang soedah biasa di dalem pergerakan.

Banjak di antaranja bangsa Tionghoa lelaki jang soedah biasa menjaksiken toean-toean Goeroe dan njonja Goeroe di atas poenja boeah-boeah pembitjaraan sewaktoe P. T. I. I. adaken Tabligh di roemahnja Toeantjoeng Tjen Siang almarhoem, serta menaro perhatian dengen apa jang dibilitjaraken, tentang soeal-soeal jang penting dari agama Islam. Djoestroe pada itoe malem dalem Tabligh sedeng kabetoelan jang di roendingken ada soeal-soeal kabatinan Islam membikin banjak di antaranja bangsa Tionghoa jang hadlir menaro perhatian kerna apa jang dibilitjaraken semoeanja jang ditrima oleh akal jang sehat.

Dan selandjoetnja kaloe P. T. I. I. bisa selaloe mengadaken Tabligh sematjem ini, di roemah-roemahnja iapoenja anggota atawa boekan anggotanja, kita rasa baroelah itoe partij bisa mendapat kamadjoean lagi jang lebih pesat, sebab menilik ka'ada'an pada malem itoe, sampe tjoekoep loemajan djoega bangsa kita dari golongan lelaki, begitoepoen dari golongan prampean jang menoendjoekken sympathienja pada soeal-soeal Igama Islam.

Begitoe djoega kita peroleh kabar dari hal banjak-nja anggotanja itoe Partij, kabarnja sekarang soedah

ada lebih 100 orang teritoeng anggota lelaki dan prampean (P. M.)

Dengan girang kita sengadja koetip kabaran di atas dalem ini orgaan, sebab dengan begitce orang-orang Tionghoa jang memelok peladjaran Khong Kauw, Buddhist atawa Sam Kauw bisa dapat liat kagiatan jang dioendjoek oleh bangsanja lelaki dan prampean jang beragama laen. Boeat orang-orang jang memang soedjoet dan giat, ini tjonto pastilah aken djadi samatjem andjoeran boeat ia bekerdjya dengan lebih giat dan soenggoe hati, samentara golongan jang biasa berlakoe males-malesan dan maen masa-bodo sadja, brangkalihi ini kabaran nanti membuat insjaf bagimana djaoe marika telah katinggalan oleh golongan jang memelok agama laen.

Maski djoega tida oesah disangsiken bahoea peladjaran Khong Kauw, Buddhist atawa Too Kauw tida kalah kabaakan dan kafaedahannja dengan laen-laen agama, tetapi dalem hal kasoedjoetan boeat menjiarken itoe peladjaran atawa bikin propaganda, begitoe poen kagiatan boeat adaken organisatie, kaliatan masih banjak jang haroes dikasih lebih banjak gas atawa diempos soemanganget baroe. Dan tjetjat jang paling kentara dari pergerakan Agama Tionghoa adalah koerangnya perhatian antara itoe kaoem sendiri, hingga katjoeari pertemoean-pertemoean besar jang dirameken dengan muziek dan disertaken penjoegeuhan limonade dan koewe-koewe, orang jang dateng mendengerin boleh dibilang poekoel-rata ada amat sedikit.

Boleh djadi koerangnya itoe perhatian ada dari lantaran jang berchotbah koerang pande dan sering bikin jang denger dj.di mengantoek. Aken tetapi toekang-toekang chotbah Kristen atawa Islam poen tida semoea bisa bitjara bagoes aken bikin pendenger djadi kagoem dan katarik. Tjoemah sadja marika

poenja kapertjaja'an dan kasoedjoetan ada lebih keras, dan perhoeboengan antara jang djadi kepala, seperti santri atawa kiajie, atawa poen padri-padrinjya, ada lebih rapet dengan penganoet-penganoetnya. Marika tida tjoemah bertemoe dalem gredja atawa masdjit, hanja sering-sering djoega diadaken perhimpoenan di roemahan boeat mengadjar dan menerangkan soeal-soeal agama. Djoestroe ini tjara bikin propaganda ada koerang diperhatiken oleh pamoeka-pamoeka kabatinan Tionghoa, jang tjoemah harep orang banjak nanti dateng denger marika poenja lezing atawa yanswat tetapi tida tjoba bikin perhoeboengan jang lebih rapet di loear perhimpoenan.

Pergerakan Khong Kauw, jang soedah berpoeloehan taon moentjoel di Indonesia, kaliatan tida bisa bikin ketarik hatinja orang-orang moeda — katjoeali dengan pake muziek, bischuit dan limonade — hingga oemoemnya dipandang sabagi pakoempoelan dari empè-empè meloeloe. Inilah brangkalih dari lantaran, kaloe berchotbah di hadapan pamoea-pamoeda, orang tida bisa blijara laen dari Hauw, aken kasih inget bagimana haroes menghormat dan berbakti pada iboe-bapa dan orang-orang perna toea. Kasoe dahannja ada banjak pamoeeda jang merasa „takoet“ denger lezing tentang Khong Kauw, kerna soedah terlaloe kenjang dan bosen sama nasehat-nasehat tentang Hauw, jang kabanjakan diartiken begitoe roepa hingga tjoemah mengenaken kawadjiban dari fihak anak pada orang toea dan djarang dibilitjaraken kawadjiban orang toea pada anak-anaknya.

Khong Tjoe tida nanti bisa mempoenai moerid-moerid orang moeda begitoe banjak kaloe tjoemah bisa yanswat tentang Hauw dan laen laen peladjaran moraal meloeloe. Di sabelahnja itoe, Khong Tjoe bikin moerid-moeridnya bergoembirah dengan adjak

djalan-djalan ka padesa'an, bermaen panah jang teritoeng sport, maen muziek dan menjanji. Tapi di Indonesia kita belon perna denger ada pemimpin Khong Kauw jang gemer tetaboean dan menjanji, malah kita taoe ada banjak jang pandang orang jang gemer maen muziek dan menjanji, apalagi kaloe soedah sedikit toea, ada koerang pantes !

Lantaran penjiar Khong Kauw tjoemah perloeken Tjoe Wat-Tjoe Wat sadja, sedeng Khong Tjoe poenja kabiasa'an muziek, menjanji, mengarang sjair, sport dan bikin picnic sama moerid-moeridnya tida begitoe diperhatiken, tida heran kaloe itoe peladjaran soesah madjoe dalem kalangan orang-orang moeda.

Sabaliknja dalem gredja Kristen kamoesian menjanji ada djadi satoe bagian penting dalem programma dari sasoeatoe perhimpoenan. Orang Islam poen biasa berdowa dan berdikir, jang mirip dengan janjian, dan boekan tjoemah sabagi hiboeran tapi djoega djadi samatjem penarik dan pengiket aken menegoehken kapertjaja'an pada itoe agama.

Maka itoe kapan orang hendak bekerdjya boeat menjiarken Sam Kauw atawa salah-satoe di antaranja, ada perloe boekan tjoemah atoer organisatie jang rapih, tapi djoega dengen methode atawa tjara jang lebih modern.

Dalem verslag dari combinatie vergadering dari Sam Kauw Hwe Telokbetong, oleh Toean Lim Giok Keng telah dimadjoeken satoe voorstel boeat Sam Kauw speciaal adaken propagandist lelaki dan prampoean jang dibajar gadji, goena mengoendjoengi roemah-roemah pendoedoek Tionghoa soepaja bisa menerangken lebih djelas tentang Sam Kauw dan toedjoeannja.

Ini pikiran ada baek sekali, dan menjotjoki dengen apa jang kita telah oendjoek di atas, tentang kaperloeannja boeat adaken kontak di roemahan, djangan

tjoemah harepin orang dateng denger lezing meloeloe.

Tetapi kita maoe oendjoek djoega disini, sabelonna itoe propagandist dilepas boeat djalan koeliling aken menjiarken Sam Kauw, ada perloe lebih doeoe marika dapet training (pengadjaran) jang dirasa tjoekoep aken sampeken kawadjibannja sabagi propagandist. Dan ini didikan, boeat mengenal Sam Kauw poenja azas dan toedjoean, tida bisa difahamken dalem sedikit waktoe, kerna orang moesti kenalins antara itoe Tiga Peladjaran poenja sari aloes jang bersama'an, dengen koelit loear jang kasar dan berbeda satoe dari laen. Satoe propagandist boekan tjoemah bisa memoedji, memboedjoek dan mengandjoerin, tapi djoega memberi keterangan satjara tjingli, dan menjawab dengen djitoe orang poenja pertanja'an-pertanja'an. Maka kapan gerakan Sam Kauw soedah mendjadi loeas, ada perloe sekalih diadaken samatjem sekola boeat didik orang orang jang hendak djadi propagandist atawa goeroe dari Sam Kauw.

Pendeknja, boeat kadepan kita-orang ada poenja amat banjak pakerdja'an aken adaken satoe organisatie jang rapih, hingga pamoeka-pamoeka dari „Agama Tionghoa“ dan orang-orang jang bersympathie pada ini gerakan tida haroes tinggal diam dan merasa poeas atas apa jang soedah dikerdijken, kerna masih ada banjak kakoerangan jang perloe ditambah dan dilengkepken, dan tjetjat-tjetjat jang haroes diperbaekken.

Mentjari Katentreman Hidoep.

(Serie II)

OLEH KWEE TEK HOAH.

(*Lezing dari Batavia Buddhist Association di Klenteng Kwan Im Tong pada tanggal 20 Aug. 1936*)

Soedara-soedara,

Ini tempo soeker jang soedah berdjalan bebrapa taon lamanja sampe sekarang masih belon berlaioe. Maski disana sini ada kaliatan tanda-tanda dari perbaikan, tapi banjak djoega jang bilang kasoekeran tambah lama semingkin heibat, kerna banjak orang jang doeloean masih ada poenja simpenan aken toe-toep katekoran lantaran soesoetnya hatsil, sekarang itoe reserve soedah poetoes sama sekali, hingga maoe atawa tida terpaksa kena terseret ka dalem kamelarat-an besar.

Berhoeboeng dengen ini ka'ada'an, maka di ini malem saja maoe samboengin lagi apa jang saja soedah bitjaraken pada bebrapa minggoe jang laloe tentang „Mentjari Katentreman Hidoep“, sebab in soeal sekarang banjak orang jang sedeng pikirin. Marika tida poeter otak lagi aken berdaja bagimana boeat djadi hartawan atawa boeat dapet kombali miliknya ja. telah moesna atawa soesoet, hanja kabanjakan jang merasa girang kaloe bisa terbebas dari itoe kameiaratan jang sedeng mengantjem di depan pintoe, atawa dari karoewetan dalem pergoletan hidoep jang soedah tida bisa dipertahankan lagi.

Kasoekeran oemoem di ini masa jaitoelah mengena-ken oeroesan oewang. Dan banjak jang anggep ini bahaja tida terlaloe soesah dilawan, kerna kaloe sadja ka'ada'an economie doenia soedah bertambah baek, hingga dagangan dan peroesaha'an madjoe kombali seperti doeloe, nistjaja banjak orang jang sekarang menganggoer aken dapet kasempetan boeat bekerdja dan itoe oewang jang telah lari menjingkir dari petipeti besi aken balik kombali.

Tetapi djoestroe oewang ada barang jang paling gesit, tida bisa kena diboedjoek, diakalin atawa dipikat dateng. Dalem ini djeman jang soeker ada banjak orang telah alamken, semingkin keras ia bekerdja dan berichtiar aken dapetken oewang, semingkin oewangnya sendiri djadi abis, lantaran di sana sini kena tertimpah karoegian. Ada banjak orang jang tjoba lakoeken samatjem peroesaha'an atawa dagangan, dalem sedikit taon telah kena roegi beberapa riboe roepiah, dan satoe di antaranja jang moesna kapitaalnya f 10,000 dalem doe taon, telah membilang: „Kaloe saja tinggal diam tida bekerdja dalem tempo lima taon, itoe oewang masih belon abis, sebab saja tjoemah pake ongkos paling banjak f 150 saboelan.

Sébaliknya di djeman mamoer ada banjak djoega orang jang alamken bagimana itoe oewang seperti mendesek dateng tjari padanja zonder di-ichtiarken lagi. Di taon 1919 perna kadjadian, beberapa moerid P.H.S. jang lagi bikin eind-examen, telah ditoeng-goein oleh wakil-wakil dari beberapa bank dan firma besar, dan begitoe lekas marika loeloes dan dapet diploma, lantes ditoentoen masoek ka dalem kantoor dengen disediaken gadji doe tiga ratoes roepiah saboelan, kerna itoe koetika banjak peroesaha'an kakoyeran pegawe jang tjakep.

Tapi sekarang ada banjak moerid-moerid jang loe-loes dari P.H.S., K.W.S. atawa H.B.S., jang tinggal loentang-lantoeng, dan antara itoe pamoea-pamoeda werkloos banjak jang merasa girang kaloe bisa dapet pakerdja'an dengen gadji f. 15 atawa f. 20 saboelan, soepaja djangan terlaloe menganggoer.

Banjak orang jang anggep soeal penganggoeran di Indonesia tida begitoe soeker dipetjahken seperti di Europa dan di Amerika, sebab kaloe sadja semoea fabriek-fabriek goela jang masih berdiri bisa meng-

giling, atawa onderneming onderneming jang sekarang distop soedah diboeka kombali, itoe soeal penganggoeran aken linjap sendiri.

Pada banjak orang itoe „kasoekeran heibat“ jang marika alamken kabanjakan tjoemah mengenaken oeroesan oewang sadjoemblah ketjil. Bagi banjak familie itoe kasockeran bisa lanles tersingkir kaloe sadja bisa mempoenjai penghatsilan tetep satiap hari satoe roepiah atawa koerang. Tapi djoestroe maski itoe djoemblah jang diharep ada begitoe ketjil, ada amat soeker didapet.

Khong Tjoe sendiri, jang mempoenjai tjoekoep pengalaman dalem kahidoepan, perna membilang :

„Djikaloe bekerdja mentjari kakaja'an soedah pasti aken berhatsil, maskipoen akoe moesti djadi satoe toekang koeda dengen pegang petjoet di tangan aken dapeiken itoe, akoe nanti kerdjaken. Dari sebab iktiar mentjari kakaja'an tida bisa ditentoecken hatsilnja, maka akoe tjoemah ambil sadja apa pakerdja'an jang tjo-tjok dan menjenangken padakoe.“ (*Loen Gie VII : 11*).

Khong Tjoe poen sampe mengarti bahoea dengen kakaja'an, jaitoe oewang, ia bisa berboeat banjak perkara baek, hingga lebih gampang sampeken segala angen-angennja, maka ia bersedia aken lakoeken pakerdja'an rendah seperti satoe toekang koeda kaloe sadja ada kapastian jang dengen ini djalan itoe kakaja'an tentoe aken dateng padanja.

Tetapi dari sebab Khong Tjoe soedah taoe jang oewang tida bisa dikedjer, maka ia memilih sadja apa pakerdja'an jang paling tjo-tjok, jang ia bisa kerdjaken dengen hati senang dan pikiran tentrem, biar poen hidoepr dalem kamiskinan.

Ini oedjar dari Khong Tjoe ada harga boeat ditimbang oleh orang-orang jang anggep kasoekeran-nya aken linjap kaloe sadja ia bisa dapet pakerdja'an jang mengasih hatsil tetep, atawa kahatsilannja jang

amat ketjil bisa bertambah, atawa dagangannya djadi lebih rame, atawa dapet tambah kapitaal, dan laen-laen sabaginya lagi, pengharepan mana kabanjakan ada bergantoeng pada beberapa kadjadian dari loear.

Tapi inilah ada satoe pengharepan jang tida boleh terlaloe diandelin, kerna seperti Khong Tjoe telah oendjoek, dan banjak orang perna alamken djoega, bahoea oewang tida bisa dikedjer, apalagi di ini djeman jang memang sanget djelek.

Sekarang moesti ditanja: apatah saorang jang sedeng terlipoeet dalem kasoekeran tida mempoenjai djalan aken terlolos? apatah ia moesti toenggoe sadja dengen sabar, dan trima apa jang aken djadi, sampe itoe nasif boeroek menjingkir sendirinja?

Ja, dalem ka'ada'an sekarang memang boeat ringanken kasoesahan dari begitoe banjak orang, tida ada satoe recept jang tjoekoep mandjoer. Achli-achli economie jang paling pande di Europa dan Amerika soedah lama poeter otak siang dan malem aken ringanken kasoesahan rahajat dari masing-masing negrinja, tapi sampe sabegitoe djaoe belon memberi hatsil memoeasken. Maski begitoe, boeat sabagian orang jang kasoesahannja belon sampe di poentjak, masih bisa djoega ditoeloeng atawa diringanken dengen goenaken Buddha poenja peladjaran.

* Itoe peladjaran dari Buddha boekan soeroe marika „trima nasif“ dengen sabar atas itoe „pertjobaan“ dari jang Maha Koeasa; boekan socroe ia berdowa atawa liamking aken minta ditoeloeng dan dikasihannin oleh Thian, Dewa, Kwan Im dan laen-laen machloek soetji; boekan mengadjar soepaja marika biar radjin pasang hio sambil bersoedoet di hadapan altaar Toapekong dengen bersihken diri, tjia-tjay dan sioe-lian, kerna maskipoen ini tjara ada djadi sabagian dari apa jang haroes dilakoeken oleh saorang Buddhist, tapi tida bisa lantes beriken

perobahan langsoeng aken marika terlolos dari ka-soekerannja.

Itoe peladjaran dari Buddha, jang bisa menoeloeng sabagian besar dari itoe orang-orang jang terlipoe dalam kasoesahan, tida laen hanja beroepa itoe satoe matjem pengadjaran djoega jang saja soedah bitjarken bebrapa minggoe jang laloe, jaitoe *mengoerang-ken kainginan*.

Dalem lezing jang doeloean saja soedah oendjoek bagimana besar kasoesahan jang ditanggoeng oleh iboe-bapa lantaran saiget ingin bikin anak-anakna djadi pinter, terpeladjar tinggi dan terhormat. Sekarang saja maoe oendjoek lagi sadjoemblaah kasoekeran heibat jang moentjoel dari lantaran adanja kainginan aken pegang deradjat, soepaja djangan dipandang rendah oleh orang banjak, satoe matjem kainginan jang timboel dari sifat angkoe dan hati tinggi.

Antara orang-orang hartawan atawa soedagar-soedagar besar ini sifat paling sering tertampak, seperti bisa diboektiken dari hal kabanjakan di antaranja, kapan oeroesan soedah moelai djelek dan kahaſilannja soesoet, masih teroes tjoba hidoeper besar seperti koetika ka'ada'annja masih baek, kerna merasa maloe, hina dan rendah kaloe moesti pindah dari gedong besar ka roemah ketjil, atawa kaloeear di straat dengen naek taxi atawa deeleman, zonder pake auto kapoenja'annja sendiri. Ada djoega orang dagang jang poenja bebrapa matjem peroesaha'an jang meroegiken, masih tjoba bergoelet aken djalanken teroes, boekan lantaran taro harepan nanti bisa dibikin madjoe dan mengoentoengken, hanja koeatir kaloe ditoetoep atawa dilquideer, orang banjak nanti boeat tertawa'an hingga meroegiken iapoenja deradjat dan nama baek. Tapi ini kabiasaan gelo jang doeloe ampir mendjadi oemoem antara orang Tionghoa, sekarang moelai koerangan, kerna soedah dapet tjonto dari Gouver-

nement dan peroesaha'an-peroesaha'an Europa jang besar, bagimana moesti ambil tindakan keras boeat soempel segala kabotjoran jang meroegiken. Maskipoen begitoe masih banjak karoegian jang bisa disingkirken kapan orang lebih siang ambil tindakan aken brentiken segala pakerdja'an jang kentara tida bisa diharep lagi, atawa ketjilken ongkos-ongkos biar tandes betoel.

Memang betoel ada banjak djoega orang dagang jang, maskipoen peroesaha'nnja empas-empis dan tida bisa toetoep ongkos, masih bisa berdiri teroes dengen djalan besarken octang dan poeter laen orang poenja oewang seperti kintjir. Djoega ada banjak orang jang bisa berdagang besar ampir zonder kapitaal, tjoemah mengandel pada kapinteran dan kaoeletannja aken bekerdja keras dengen tida kenal tjape. Tapi ini matjem tjara hidoepl, maski dari loear kaliaatannja bagoes, soedah pasti ada terdjaoe dari katentreman. Saorang dagang jang terdesek oetang, kabanjakan jang sama djoega mendjadi boedak dari iapoenna crediteurs jang di saban waktoe bisa bikin ia tergoeling. Ka'ada'nnja seringkalih lebih tjlaka dari orang hoekoeman kerdja paksa, kerna sedeng itoe orang-orang rante bisa taoe di taon kapan hoe-koemannja aken berachir, si soedagar jang bekerdja keras boeat toetoep lobang dan gali lobang tida taoe dalem tempo brapa lama ia bisa terlepas dari itoe soemoer oetang ka dalem mana ia soedah terbenem dengen tambah lama semingk'n dalem.

Sabedoelna orang jang terlibet dalem ini matjem kasoekeran bisa lolosken diri dengen djalan brentiken peroesaha'nnja atawa serahken itoe pada iapoenna crediteurs dan menjataken tida sanggoep madjoeken lebih djaoe; tapi kaloe tida terlaloe terdesek dan terpaksa djarang jang maoe ambil ini tindakan lantaran merasa maloe kaloe tida „bekeerdja besar“.

Begitoelah achiRNAjA banjak jang tjoba bergelet teroes mati-matian, dan di dalem kasoekerannja marika poenja hati mendjadi keras dan kedjem, hingga tida djidji lakoeken perboeatan terlarang soepaja bisa dapet kaoentoengan, saifipe achiRNAjA itoe peroesa-ha'an ambrek dengen tida bisa ditoeloeng poelah atawa kasehatan sendiri djadi roesak.

Dipandang dari sihak mentjari katentreman ini tjara beroesaha pastilah ada sanget tida tjomok, kerna lebih baek hidoeP saderhana dengen pikiran tentrem dari-pada bekerdja dan hidoeP „besar“ dengen hati tergontjang teroes-meneroes. ItOE karaoewetan boekan sadja meroesak pada batin, jang djadi kedjem, tjoerang, serakah dan tida djidji pada kadosa'an, tapi djoega menjiptaken Karma djelek jang berdjalan sampe pada penghidoePan-penghidoePan jang aken dateng, kerna pikiran jang tjoemah ditoedjoeken pada oeroesau mentjari kakaja'an dengen tida perdoeli kanan dan kiri, pastilah mendatengken boeah-boeah jang tida di-ingin.

PenghidoePan di doenia ini tjoemah samatje m sekola, hingga sasoeatoe orang jang insjaf sama toedjoean hidoePnja haroes berdaja aken djangan sia-siaken tempo boeat kedjer barang jang tida kekel. Maka di sabelahnja pakerdja'an jang perloe boeat penghidoePan dan pelihara familie satjara pan-tes, haroeslah orang adaken tempo boeat mentjari kamadjoean rohani, jang bisa didapet dengen toen-toet penghidoePan saderhana tapi tentrem.

ItOE kasaderhana'an tida bisa moentjoel kapan sifat sompong, angkoeh dan hati tinggi masih belon bisa ditindes dan ditjaboet akarnja sama sekalih. Saorang miskin bisa tingga di roemah bamboe tertoeLoep atep dengen hidoeP saketjil-keijlnja, tapi kapan dalem batinnja masih mengerem itOE kabangga'an dan kasombongan ia poenja sikep poen gampang berobah, dan

banjak jang lantes kasih oendjoek ka'angkoean dan kalojaran begitoe lekas ka'ada'nnja mendjadi baek. Dengan begitoe ia telah tjiptaken bahan boeat alamken poelah kasoesahan baroe, kerna itoe kabangga-an, dan kainginan aken banggain pada orang banjak iapoenja kamampoean, bisa membikin ia terdjeroemoes kombali ka dalem kamiskinan. Maka tjoemah saorang jang hidoeper saderhana, jaitoe jang bisa tindes ka-inginan boeat bersaing dalem hal kabagoesan dan kamentèrèngan dengan laen-laen orang, tida ingin banggain milik dan kakaja'nnja, tida mengiri atas laen orang poenja kadjaja'an atawa kamamoeran, dan tida perdoeli apa jang laen orang bitjara tentang dirinja, baroelah bisa dapet katentreman kekel.

Brangkalih ada jang nanti bilang, ini matjem peladjaran bisa membikin orang Tionghoa poenja nafsoe dan kagiatan aken bekerdja boeat mentjari kakaja'an nanti mendjadi dingin, kerna kaloe semoea tida maoe bergoelet aken alamken kasoesahan achirnya marika poenja penghidoepon djadi merosot ka dalem tingkatan dari orang pribomei.

Atas ini kaberatan saja maoe menjaoet, bahoea toedjoean dari ini lezing adalah boeat bitjaraken soeal *mentjari katentreman hidoeper*, boekan boeat rewelin soeal bagimana moesti perbaeki economie Tionghoa. Maka siapa beranggepai bahoea mentjari kakaja'an ada lebih perloe, ia poen ada merdika aken tjeboerken diri dalem itoe pergoelefan; tetapi sabaliknya barang siapa soedah merasa lelah, djengkel dan bosen sama itoe matjem penghidoepon, dan ingin dapetken apa-apa jang lebih memoeasken, aman dan tentrem, soepaja bisa memadjoeken batin, ia tida bisa memilih djalan jang lebih baek dari-pada apa jang telah dioendjoek oleh Buddha, jaitoe tindes segala pikiran jang mengandoeng kasombongan aken banggain kakaja'an dan deradjat di moeka orang ba-

njak, soepaja ia bisa hidoepl dengen saderhana, kerna itoe kasaderhana'an nanti bikin ia terbebas dari ka-soesahan oewang hingga tida oesah moesti bergoelet terlaloe keras goena tjari penghidoepl, dan berba-reng dengen itoe ia aken dapetken katentreman jang langgeng.

Soeal economie Tionghoa dikoeatir nanti moendoer dan penghidoepl kita-orang aken merosot ka dalem tingkatan orang pribumi, inilah tjoemah sama'jem doega-doegaan jang masih belon pasti bener tidanja. Biarlah djangan diloepla, kapan nasif baek moelai moentjoel, zonder terlaloe banjak bergoelet orang poen bisa djoega mendapet hatsil memoeasken. Dengan ber-dasar pada oedjar dari Khong Tjoe, jang kakaja'an tida bisa dikedjer, maka saja pikir ada pantes dan djamak kaloe orang jang soedah merasa lelah oen-doerken diri dari medan pertempoeran hebat boeat kedjer kakaja'an jang belon tentoe berhalasil, dan aken gantinja tjoba mentjari katentreman hidoepl me-noeroet recept dari Buddha jang kaloe ditoeroet de-njen betoel soedah pasti tida aken gagal.

Boekan sadja orang jang kaädaänna memang pajah, hanja jang baroe satengah pajah poen bisa menarik kafaedahan kapan bisa biasain aken hidoepl saderhana dengen djalan tindes sasoeatoe pikiran aken banggain diri, pegang deradjat, ingin dipandang tinggi dan laen-laen kageloan lagi jang mendjadi bibit dari sakean banjak karoewetan dan kasoesahan dalem penghi-doepan dari segala bangsa dan segala tingkatan dari jang paling tinggi sampe pada golongan rendah.

Lezing Khong Kauw di Batoeretno.

Pada kadoea kalihnya, koetika pada tanggal 5 Juli 1936, malem djam 9 di Batoeretno atas oendangan-na H. C. T. N. H., beberapa orang-orang Khong Kauw di Solo di bawah pimpinannya toean Liem Tiang Hwat, soedah bikin lezing tentang pelajaran Nabi Khong Tjoe prihal *Tjee Ke* atawa „Bagimana aken atoer roemah tangga, soepaja semoea orang bisa djadi baek dan beres.“

Pada itne malem, perhatian ada lebih besar kaloe dibanding dengan lezing jang pertama; di sitoe ada tuenet berhadir dari beberapa ambtenaren B. B., dan fihak Indonesiers nepanja djoega banjak, sedeng fihak Lie Tong-pauw kaliasan tiada sedikit, koerang-lebih, pada itne malem jang soedah dateng ada 250 orang.

Ihoe lezing pertama ada diboeka oleh toean Tjan Thiam Tiwar, woorzitter H. C. T. N. H. di itoe tempat, dan seperti biasa, sasmedahnja toean Tjan hatoerken lagenerja slanet dateng pada semoea jang hadir, pada fihak B. B., dan pada orang-orang Khong Kauw dari Solo, ia telke menerangkan, sedari di Batoeretno dibikin lezing tentang pelajaran Khong Kauw jang pertama, nepanja banjak pendoedoek Tionghoa di itoe tempat, sedikit dengan sedikit, telah inget poela pada segala kasopanan-kasopanan sendiri jang djiati poesakanja, dari itoe betrappa pendoedoek di itne tempat ada sanget harepken aken bisa dibikin lezing jang kadoea kalihnya, maka tiada heran pada ini malem telah dapet perhatian lebih besar dari fihak orang-orang Tionghoa saoemoemna.

Begituepoen tentang koendjoengannja beberapa saudara saedara Indonesiers, kata toean Tjan, ada satoe tanda, bagimana hoeboengan kadoea bangsa ada sampe baek dan sampe rapet, dan brangkalih

soedara-soedara Indonesiers djoega merasa ingin sekalih aken toeroet mendengerken, hal kasopanan dan peladjaran dari orang-orang Tionghoa. Dengan sesama orang-orang Timoer, dan sama-sama bangsa berwarna, atawa sedikitnya prihal kasopanan dan peladjaran ampir bersama'an, moelai sekarang da'i sateroesnya, perhoeboengan kadoea bangsa tersebut, bangsa Tionghoa dan Indonesiers, bisa hidoepl lebih kekel dan lebih manis.

Begitoepoen tiada dillopa boeat hatoeiken banjak trima kasih pada orang-orang Khong Kauw jang soedah memperloeken dateng atas itoe oendangan boeat toetoerken tentang kasopanan dan peladjaran sendiri, teroetama peladjaran Khong Kauw.

Sasoedahnja laloe dipersilaken toean Liem Tiang Hwat boeat bitjara.

Toeant Liem tjoemah menghatoerken iapoenja trima kasih pada semoea bestuurs H. C. T. N. H. di Batoeretno jang soedah soeka aken korbanken tenaga dan pikirannya, boeat kembangken sebisanya pada kasopanan dan peladjaran dari leloehoer sendiri di antara semoea Tong-pauw jang hidoepl mentjil di antara tanah-tanah pegoenoengan seperti Batoeretno.

Lebih djaoeh tiada dilloepaken, toeant Liem ada minta dengen hormat pada semoea orang jang mendenger lantaran jang dateng dari Solo boekan ada itoe orang-orang jang betoel mengarti — achli achli — dari kasopanan dan peladjaran Tionghoa, brangkalih di antaranya ada jang menoetoerken kliroe, biarlah nanti soeka dibriken ma'af.

Dipers lahken toeant Tjoe Tik Hing boeat membitjaraken prihal „Sioe Sien,” atawa „oeroes diri soepaja djadi baek.”

Spreker ada ambil penoetoeran dari isinja kitab *Thay Hak* jang mana ada menerangken, bahoea sasoeatoe orang, dari atas moelai radja hingga sam-

pe pada rahajat biasa, semoea perloe haroes bisa Sioe Sien.

Spreker ada terangken, bahoea artian „Sioe Sien“ bisa aken diartiken dengen bahasa Djawa „Mengolah watak“

Mengolah, jalah beroesaha, dan watak, adalah watek, artian lebih djelas, merbaeki pada batin sendiri.

Menoeroet penoetoeran spreker, bahoea Sioe Sien boekan sadja ada membawa kafaedahan pada diri sendiri, tapi malah bisa aken mengenaken pada sanak-familierja.

Dan bahoea Sioe Sien adalah pokojang teroetama dari sasoeame orang jang aken *Tjee Ke* atawa atoer noemah tangga.

Djoega Sioe Sien ada mempoenjai hoeboengan rapet dengen apa jang dibilang *pendidikan*.

Menoeroet anggepan spreker, bahoea pendidikan sekarang ada didasarkeni dengen karohanian, seperti bisa dimengarti, bahoea badan djasmani itoe, sasoeng-goenga tiada ada goenanja, maka saorang jang bisa aken didik pada rohaninja, nanti keada'an-keada'an loear djadi baek sendirinja.

Spreker ada bilang, kaloe sasoeatoe orang bisa Sioe Sien, tentoe sekali nanti bakal bisa membantoe boear bikin tentrem negri.

Menoeroet peladjaran Tjing Tjoe, salah satoe muenitria Nabi Khong Tjoe, saorang jang soedah bisa Sioe Sien, tiada gampang djadi marah maskipun diafetken tjeuhuan-tjeuhuan dari siapa djoega, boekan sadja tjoenah tiada djadi marah, malah itoe tjeuhuan dianggep sebagai satoe nasehat jang berharga, dan terhadep pada dirinja sendiri, nanti ditjari, apa ada itoe kasalahan-kasalahan atawa tiada, kaloe dalem dirinja betoel terdapet itoe kasalahan, nanti dengen lekas maoe dirobah, sebaliknya kaloe tiada, biarlah kita anggep sebagai satoe peringatan.

Komoedian spreker menerangken, bahoea Nabi Khong Tjoe itoe adalah satoe penoentoen bagi kita orang Tionghoa saoemoemnja boeat menoedjoe ke pada djalan kasampoerna'an.

Betoel tiada kliroe, bahoea sasoeatoe Nabi, maskipoen hidoe di mana djoega, berlaenan tempat dan tiada bersama'an waktoe, tapi dalem peladjarannja tentoe ada sama sadja ; spreker ambil tjonto tentang adanja Ie Ien di djeman Siang Thong, dan Baginda Tjoe Boen Ong di djeman Tjoe, maskipoen itoe kadoea orang tiada berbareng hidoe di satoe djeman, tapi dalem toedjoean ada seroepa, jaitoe aken mengandjoeri soepaja orang soeka berlakoe baek dan soetji.

Laen dari itoe, spreker banjak petik isinja kitab *Bing Tjoe*.

Sasoedah mana laloe dipersilahkan toean Auw Ing Kiong boeat bitjara tentang „Tjee Ke“.

Apa jang dibilang „Tjee Ke“ atawa „mengatoer roemah tangga“ boekan berarti mengatoer perabot dan meubel, tapi adalah bermaksoed soepaja semoea orang sadalem roemah tangga bisa mempoenjai kasopanan dan hidoe dami.

Dalem kitab *Thay Hak* ada ditoetoerken :

„Saorang jang maoe melakoeken iapoenna kabedjikan dan kasoetjian pada doenia, haroes terlebih doeloe koedoe bisa atoer negrinja soepaja djadi aman ; sedeng boeat atoer negrinja soepaja djadi aman, perloe terlebih doeloe koedoe bisa atoer iapoenna roemah tangga, soepaja djadi baek ; dan boeat atoer iapoenna roemah tangga soepaja djadi baek, perloe terlebih doeloe koedoe bisa oeroes dirinja soepaja bisa soetji ; sedeng aken oeroes dirinja soepaja djadi soetji, terlebih doeloe koedoe bisa bikin djedjek pada hatinja ; saorang jang maoe bikin djedjek hatinja, terlebih doeloe koedoe bisa bikin

LEZING KHONG KAUW DI BATUERETNO.

soenggoe-soenggoe pada pikirannja; saorang jang maoe bikin soenggoe-soenggoe pada pikirannja, terlebih doeloe moesti bisa bikin sampoerna pada pengartian; dan saorang jang maoe bikin sampoerna pada pengertian, semoea tergantoeng pada wetnja segala benda."

Hal atoer negri, lantaran spreker memang ada saorang jang tida mengarti prihal politiek atawa pamerentahan, ada lebih baek ditinggal dan tiada oesah aken dibitjarken, tapi di blakang maoe membitjarken prihal *Tjee Ke* atawa atoer roemah tangga, seperti apa jang soedah ditetepken sebagai onderwerp boeat pembitjara'an di ini malem.

Hal *Tjee Ke* atawa atoer roemah tangga, spreker menerangkan, jaitoe orang-orang sadalem roemah, soepaja bisa dami dan idoep roekoен, masing-masing soepaja bisa menetepi pada kawadjibannja sendiri-sendiri.

Tjoemah seperti soedah diterangken, bahoea saorang jang maoe atoer iapoena roemah tangga, perloe haroes bisa oeroes pada dirinja, apa jang dibilang oeroes dirinja, jaitoe teritoeng djoega dengan apa jang dibilang perbaeki iapoena badan djasmani dan badan rohani, sebab saorang jang tjoemah bisa perbaeki satoe fihak, ada koerang sampoerna, seperti saorang jang maskipoen iapoena badan djasmani ada tjoekoep baek, tapi kaloe batin-jahat, ada apakah goenanja? Sebaliknya, maskipoen iapoena batin baek, tapi kaloe badan djasmani tiada karoean, toch djoega ada koerang baek.

Tentang maoe bikin baek diri, terlebih doeloe orang haroes bisa bikin djoedjoer hati, kerna saorang jang hatinja masih mengok ka sana sini, apakah kiranya bisa aken perbaeki pada dirinja? Begitoe sateroesnya.

Dalem kitab *Tay Hak* ada ditoelis :

„Apa jang dibilang atoer negri, haroes terlebih doeloe atoer roemah tangga, kerna orang jang belon bisa atoer roemah tangga, dan orang-orangnya belon mengarti tentang kasopanan, tapi bisa aken didik pada laen orang, tentoelah tiada ada.”

Dalem laen bagian djoega ada ditoelis :

„Kaloe sadalem roemah tangga semoea soedah bisa baek, dan masing-masing soedah mempoenjai tjinta-asih pada sesamanja, nantilah bisa bikin semoea rahajat negri ditoentoen mempoenjai tjinta-asih djoega. . . .”

Lafal di atas betoel maoe ditoedjoeken pada Baginda Tjioe Boen Ong saorang, sebab kaloe pada itoe masa, Tjioe Boen Ong bisa dapet kasoedjoetan-nya semoea rahajat, adalah lantaran terlebih doeloe ia dan semoea familienja bisa diboeat tjonto jang baek.

Ini hal banjak sekalih orang jang merasa tiada poeas, sebab orang tiada perloe aken tengok pada orang poenja ka'ada'an persoon atawa ka'ada'an iapoenna roemah tangga, tapi jang paling teroetama adalah tentang sepak-terdjanganja itoe orang. Tapi, brapa banjak orang jang tjoemah maoe taoe sadja, tentang itoe orang poenja penghidoepan persoon ?

Kerep kalih sasoeatoe orang poenja penghidoepan persoon, ada pengaroehken djoega terhadep pada iapoenna pakerdja'an, terlebih poelah aken tjeboer-ken dirinja ka dalem kalangan kabedjikan, seperti djoega bisa dimengarti, saorang jang dalem batinnja masih boeas dan masih djahat, tjara bagimana aken bisa toeroet tjampoer dalem oeroesan Sia-hwee ? Begitoe poen satoe kepala roemah tangga jang masih njasar, apakah kiranya bisa diindahken oleh orang-orang sadalem roemah tangganja ?

Dalem kitab *Loen Gie* ada ditoetoerken, bagimana tatkala Nabi Khong Tjoe koetika ditanja oleh salah

LEZING KHONG KAUW DI BATOERETNO.

satoe orang, mengapa jang ia tiada maoe pegang djabatan negri sebagai satoe ambtenaar? Nabi Khong Tjoe soedah briken djawaban, bahoea saorang jang soedah bisa berlakoe bakti pada orang toeanja dan bisa menjinta pada soedara-soedaranja, itoelahi ada seroepa orang jang pegang pamerentahan.

Sebab Nabi Khong Tjoe mempoenjai anggepan, bahoea saorang jang pegang pamerentahan negri, mak-soed jang teroetama adalah aken bikin baek pada rahajat di sebawahnya dan ia ada sebagai tjontonja ; maskipoen ia tiada pegang pakerdja'an negri sebagai satoe ambtenaar, tapi kaloe ia soedah bisa djadi tjonto jang baek bagi Sia-hwee, itoelah ada seroepa sadja.

Atawa dalem maksoednya, Nabi Khong Tjoe maoe membilang, kaloe sasoeatoe roemah tangga, orang-orangnya soedah djadi baek dan mengarti kasopanan, tentoelah nanti negri bakal djadi aman dan tentrem sendirinja.

Soepaja tiada terlaloe memoeter, kata spreker, di disini tjoba saja bitjaraken tentang apa jang djadi toedjoeannja ini lezing :

Dalem hal mengatoer roemah tangga, pokok jang teroetama, kaloe menoeroet kasopanan Tionghoa, jalih orang haroes mengoetamaken prihal *Ngo Loen*, lima hoeboengan :

1. Hoeboengan antara radja dan mantri.
2. Hoeboengan antara soeami dan istri.
3. Hoeboengan antara ajah dan anak.
4. Hoeboengan antara orang jang pernah toewa dan orang jang pernah moeda.
5. Hoeboengan antara sobat-ande.

Lantaran itoe hoeboengan mempoenjai kalangan jang begitoe loeas, disini baek saja terangken sedikit prihal „soeami dan istri," sebab mana bahoea „soeami dan istri" ada pokok jang paling teroetama

boeat pegang kendali dalem roemah tangga, kata spreker.

Dalem kitab *Hwan Ke Tjiep* ada ditoelis :

„Roemah tangga poenja wali, ada seperti djoega negri poenja radja, sedeng semoea orang sadalem roemah-tanganja semoea bakal tiroe padanja.“

„Saorang jang djadi wali (kepala), perloe sekalih bisa berlakoe pada semoea orang dengen djoedjoer, sebab dengen goenaken kadjoedjoeran, nanti semoea orang sadalem roemah bakal djadi toeroet djoedjoer ; sebaliknya, kaloe orang jang djadi wali tiada djoedjoer, tapi maoe bikin ojoedjoer pada semoea orang sadalem roemah, tentoelah tiada bisa berhatsil.

Menilik pitoetoer di atas, kiranya semoea orang tentoe merasa setoedjoe, sebab kaloe orang jang djadi wali, jang bakal diboeat tjonto bagi semoea orang sadalem roemah, tiada bisa berlakoe baek, apakah orang laen maoe berlakoe soetji? Seperti djoega, kaloe ada satoe ajah jang dojan ngelajap, apakah kiranya bakal tiada pengaroehken pada semoea anak-anaknya aken toeroet ngelajap? Inilah orang bisa mengarti sendiri.

Laen dari itoe, dalem pribahasa Tionghoa ada ditoelis :

„Djalan satoe-satoenja boeat atoer roemah tangga soepaja djadi beres dan baek, haroes terlebih doeloe orang jang maoe atoer koedoe bisa bikin baek pada dirinja, dan orang haroes pandang teroetama prihal angker dan adil.“

Seperti di atas soedah diterangkan, saorang jang belon bisa lebih doeloe perbaeki pada dirinja, tentoelah bakal tiada bisa bikin baek pada orang-orang sabawahnja, seperti pribahasa Melajoe ada bilang ; „Kaloe goeroe kentjing berdiri, tentoe ada moeridnja kentjing berlari.“

Sedeng jang dibilang „angker“ jaitee maoe dimak-

soednya orang haroes bisa pegang kahormatan, djang-
ngan sembarang merendahkan dirinja dengan
segala peromongan dan perboeatan jang tida pantes.

Dan jang dibilang „adil,“ jaitoe di mana ada jang
koerang betoel dan kliroe, haroes lekas dirobah dan
dilarang, terlebih lagi terhadep pada anak-anaknja;
bagi orang toewa tiada boleh aken miring ka sana,
atawa dojong ka sini, sebab dengen berlakoe begitoe,
segala prentahnja tentoe bakal tiada bisa di'indahken.”

Lagi pribahasa ada kata :

„Roemah tangga poenja pokok jang teroetama,
berada pada orang poenja badan; dan orang poenja
diri prihal peromongan, prilakoe, kasoeka'an, dan
kabedjikan, itoelah semoea bakal pengaroehken orang-
orang saroemah tangga.”

Maka kaloe menilik itoe semoea pitoetoer, bagi
satoe wali roemah tangga, ternjata kawadjibannja
tiada enteng sebab separa iapoenja peromongan,
setindak iapoenja prilakoe, semoea bakal djadi tjonto
anak-tjoetjoenja; kaloe itoe tjonto ada baek, tentoe-
lah bakal mendatengken boeahnja jang baek; seba-
liknya, kaloe itoe tjonto ada djelek, tentoelah bakal
mendatengken boeahnja jang djelek djoega.

Lebih djaoeh ada dikata :

„Saorang jang djadi kepala roemah tangga, moesti
koedoe dengan ati-ati boeat mendjaga kasopanan,
jang mana perloenza boeat kendaliken semoea anak-
tjoetjoenja.”

Spreker ada membitjaraken hal soeami-istri, me-
noeroet kasopanan Tionghoa di djeman koeno,
bahoea soeami-istri ada dipandang begitoe soe-
tji sekalih, sebab itoe perkawinan atawa soeami-istri,
ada pokok jang teroetama boeat bisa dapetken toé-
roenan-toeroenan jang baek.

Di doenia tiada ada satoe poehoen jang djadi baek,
kaloe bermoela-moela boekan berasal dari bidji jang

baek, dari itoe saorang jang inginken dapet toe-roenan jang baek-baek, tiada boleh tiada, marika koedoe perhatiken pada bidji-bidjinja.

Dalem kitab *Gwan Thee Tjiep* ada ditoelis :

„Soeami-istri ada permoela'an dari hal prika-manoesia'an ; boeat soeami haroes bisa hidoeep sabar, dan mempoenjai kasopanan, sedeng boeat istri, haroes bisa mengindahken dan taro kahormatan “

Sebagimana bisa dimengarti, satoe soeami jang bengis dengen tiada mempoenjai kasabaran terhadep pada istrinja, boekan sadja nanti sang istri bakal berbalik djadi brani, poen keada'an-keada'an dalem roemah tangga tentoe bakal djadi kaloet tiada **ka-roean'**; sebaliknya, boeat fihak kaoem istri, jang tiada bisa endahken dan hormatken pada soeaminja, djoega dalem ka'ada'an roemah tangga bakal djadi antjoer dan riboet sahari-hari.

Tapi banjak sekalih fihak lelaki Tionghoa, kaloe ia soedah berdiri di atas angin, dengen zonder maoe perdoeli lagi pada ka'ada'an dari fihak prempoean, dan ada jang sanget keterlaloean, itoe istri dianggep sebagai satoe baboe ; sebaliknya, beberapa kaoem prempoean jang djoedes, sebisa-bisa marika aken kendaliken pada soeaminja, hingga sang soeami merasa teriket dan tiada bisa aken berkoetik lagi. Penghidoepan satjara begini, tentoe sadja bakal menimboelken banjak kagetiran dari pada kamanisan.

Sedeng kaloe menoeroet penoetoeran dari kasopanan Tionghoa seperti telah dibilang, bahoea toe-djoean orang jang berlaki-istri hanja aken melakoeken kasoetjian, dan boekan ada satoe kasenangan.

Saorang jang mengarti apa jang dibilang melakoeken kasoetjian, ia tentoe bakal tiada brani aken berlakoe gegabah dalem segala perboeatannja, sebab melakoeken kasoetjian, orang tiada boleh sembrangan aken berboeat, dan dalem kitab *Lie Tjoe Soe*

Sie ada ditoelis :

„Djalannja soeami-istri (berlaki-bini), ada sama dengen sifatnja itoe alam poenja hawa Im-Yang (*positief* dan *negatif*), dan bisa bikin contact pada Roh-roh soetji.”

Apa jang dibilang „bisa bikin contact pada Roh-roh soetji,” sasoeatoe pernikahan, kaloe betoel djilakoeken dengen kasoetjian dan k bersihan, nantilah bakal bisa menoeroenken itoe roh-roh jang baek; sebaliknya, pernikahan jarg dilakoeken dengen katjerooboan dan sembarang, toeroenan-toeroenan jang marika tjiptaken tentoelah ada Roh-roh jang djahat.

Maka kaloe menilik itoe, apakah boleh orang jang memang ingin boeat dapetken toeroenan jang baek-baek, aken pandang oeroesan berlaki-istri sebagai satoe perkara jang boleh diboat sembarang sadja? Inilah orang boleh pikir sendiri.

Menoeroet penoetoeran kitab *Tjoo Djien King* ada ditoelis :

„Apa jang dibilang „soeami istri,” dalem angeng-angennja haroes bisa saling tjotjok, dan katjinta’nnja haroes kekel . . .”

Lagi dalem pribahasa Tionghoa ada dibilang :

„Satoe soeami, jaitoe dalem kawadjibannja, haroes menoentoen atawa menoeloeng, sedeng kadoedoekannja ada di loear, agar iapoenna istri bisa toempangken diri hingga sampe saoemoer hidoeppna, maka tjoemah satoe soeami jang bisa menetepi pada kawadjibannja sadja, hingga iapoenna istri tiada djadi melèsèt dari kadoedoekannja sebagai satoe istri, baroe-lah itoe soeami bisa dibilang soedah menetepi apa jang djadi kawadjibannja.”

Menilik itoe pitoetoer, sasoenggoenja orang tiada bisa aken bilang, bahoea kasopanan Tionghoa ada terlaloe menindes pada fihak prempoean, malah

kaloe menoeroet saja poenja pemandangan, kata spreker, kasopanan Tionghoa ada tjoekoep tinggi boeat menghargaken pada kaoem prempoean, tapi pada waktoe jang paling belakangan ini, banjak sekalih orang-orang Tionghoa pada mempoenjai anggepan aken pandang berat pada kaoem lelaki, sabaliknya, pandang remeh pada kaoem prampeoan.

Dalem kitab *Thwan Ke Tjie Poo* ada ditoelis:

„Satoe soeami, paling teroetama haroes bisa meneperi apa jang djadi kawadjibannja sabagi satoe soeami, marika satindak-satindak haroes bisa bikin djoedjoer pada dirinja sendiri, jang mana perloenza boeat menoentoen pada istrinja soepaja bisa taro perindahan padanja.“

Maka boeat satoe lelaki jang maoe menetipi pada kawadjibannja, apakah boleh aken tiada berlakoe ati-ati? Seperti soedah dibilang, bahoea satoe soeami ada mempoenjai kawadjiban besar boeat toentoen pada istrinja soepaja bisa bergeuna dan djadi orang jang baek-baek.

Sabaliknya, bagi kaoem prempoean djoega ada memikoel satoe kawadjiban jang boekan enteng; dalem kitab *Hing Pho Siem Thwan* ada ditoelis:

„Tentang ambles dan mamoernja sasoeatoe roemah tangga. semoea ada tergantoeng pada sang istri.“

Menilik itoe, bahoea kaoem istri ada pegang roj penting dalem roemah tangga, boekan tjoemah **asal** kaoem prampeoan soedah bisa meladeni pada soeaminja dengen bersoeka-soeka dan bersenang, tapi kaoem prampeoan haroes tanggoeng djawab tentang karoesakan dalem roemah tangga, sebab semoea oeroesan ada terserah dalem tangannja.

Maka dalem pribahasa Tionghoa ada dibilang:

„Istri jalah pengatoer, sama-sama idoep soesah, dan sama-sama idoep manis dan speker...“

Lebih djaoe ada dibilang :

LEZING KHONG KAUW DI BATÓERETNO.

„Kaloe ada satoe istri jang tiada betoel, soeami ada itoe kawadjiban boeat toentoen padanja dengen ka-djoedjoeran; sabaliknya, kaloe ada satoe lelaki jang tiada betoel, istri ada itoe kawadjiban boeat toentoen padanja dengen atoeran.“

Kawadjiban-kawadjiban jang teroetama bagi kaoem prampoean, dalem *Lie Tjoe Soe Sie* ada ditaelis:

„Kaoem prampoean haroes mempoenja ampat prilakoe jang oetama:

„1. Kabedjikan; 2. Peromongan; 3. Roepa; 4. Pakerdja'an.

Jang dibilang „Kabedjikanja kaoem prampoean,” jalih orang tiada oesah moesti mempoenjai kapinteran jang loear biasa, tapi asal sadja bisa diam dan soetji, pegang iapoenja kasoetjian dengen beres, segala perboeatan jang tiada baek ia merasa maloe aken kerdjaken, dan segala gerak-gerakannya mem poenjai atoeran.

Jang dibilang „Peromongannja kaoem prampoean,” jalih tiada oesah orang prampoean koedoe pande bitjara boeat berbantah, tapi jang paling teroetama, adalah orang prampoean boleh pilih peromongan jang baek, tiada membitjaraken prihal peromongan jang djahat, baroe beromong pada waktoe jang baek, hingga itoe peromongan tiada membikin orang djadi djemoe.

Jang dibilang „Roepanja orang Prampoean,” jalih tiada oesah koedoe mempoenjai roepa jang elok, tapi asal bisa bersih, berpakean tiada mesoem, soeka mandi, dan tiada kotor.

Jang dibilang „Pakerdja'annja orang prampoean,” tiada oesah koedoe mempoenjai kapandean jang melebihi dari laen orang, asal sadja soeka menenoen, mendjait, tiada oesah gegoejon dan bertjanda, bisa atoer makanan dan bisa trima tetamoe dengan baek.

Antara laen-laen di sini bisa diambil satoe hikajat,

bagimana saorang prampeoan di djeman doeloe kala,
jang soedah menetepi pada kaoetama'annja saorang
prampeoan :

Istrinja saorang di negri Louw, Tjhioe Oh Tjoe,
jang bernama Kiat, atawa belakangan orang seboet
Louw Tjhioe Kiat, adalah satoe prampeoan jang
mempoenjai kasoeijian dan kaoetama'an.

Telah ditoetoerken, tentang perkawinan antara
Tjhioe Oh Tjoe dan Kiat, baroe sadja dilakoeken
dalem lima hari lamanja, sang soeami oleh radja
soedah dioetoes ka negri Tien.

Lima taon telah berselang, Tjhioe Oh Tjoe baroe
poelang dari negri Tien, dan tatkala ia poelang ka
doesoennja, tatkala liwat di kebon moerbei, ia dapet
taoe ada satoe prampeoan moeda petik toe daon;
meliat itoe, Tjhioe Oh Tjoe telah toeroen dari kretan-
ja, dengen setjara kasar telah dibilang, ada meng-
ganggoe pada itoe prampeoan moeda, tapi itoe
ganggoean maskipoen Tjhioe Oh Tjoe memboedjoek
aken kasi oeang sabanjrnja, tetep itoe prampeoan
menolak dan kasi oendjoek iapoenja aer moeka jang
angker sekalih.

Tjhioe Oh Tjoe, sasoedahnja poelang ka roemah
dan ketemoein pada iboenja, sang iboe soedah
panggil pada mantoenja, jaitoe Kiat, dan tatkala
Kiat kaloeear dan dapet liat pada Tjhioe Oh Tjoe,
ia kenalin seperti itoe orang jang soedah menggang-
goe di kebon moerbei, kerna itoe prampeoan moeda
tiada laen, hanja Kiat, istrinja Tjhioe Oh Tjoe, sendiri,
jang sekarang djadi goesar sekalih.

Kiat di depannja sang mertoewa soedah damprat
pada soeaminja dengen perkata'an-perkata'an jang
pedes dan tadjem sekalih.

„Kaoe soedah berpamitan pada iboe pergi ka tem-
pat djaoeh, dalem lima taon baroe poelang, sahroes-
nja kaloe kaoe ada satoe anak jang baek, sebrapa

lekas kaoe tentoe lantes poelang, tapi sekarang kaoe dengen mengganggoe pada satoe prampoean di tepi djalanen jang memetik daon moerbei, samata mata merendahken deradjatna kaoe poenja kadoedoekan, dan dengen senang kaoe maoe kasi oeang sebanjak banjaknya, itoelah ada satoe tanda, jang kaoe soedah loepa pada iboe.

„Saorang jang soedah loepa pada iboenja, itoelah tandanya tiada bisa berbakti, terlebih poela dalem **kaoe** poenja pikiran ada mengandoeng itoe angen angen tjaboel, itoelah ada satoe perboeatan jang sanget rendah sekalih.

„Saorang jang soedah loepa pada orang toewanja dan mempoenjai pikiran tjaboel, pastilah bakal tiada bisa aken bersetia pada radjanja; apakah itoe ada satoe prilakoe jang oetama bagi lelaki jang mempoenjai angen angen boeat bertindak madjoe?“

Lantaran sang tempo soedah terlaloe malem, itoe pembitjara'an telah dibrentiken sampe di sitoe.

Dan komoedian itoe pembitjara'an disamboeng sedikit oleh toean Liem Tiang Hwat.

Kira djam 11,30 itoe lezing ditoetoep dengen **slamet**.

Sam Kauw Hwe Telokbetong.

Lezing 8-3-1936.

Soedara-soedara,

Saja merasa sanget bersoekkoer bahoea ini malem saja bisa soegoehken lezingnja toean Sie Sing Giok di Tempeh. Maski toean Sie beräda di Java, ternjata atas sympathienja berhoeboeng dengen toedjoean Sam Kauw Hwe jang dalem segala hal meminta boeah pikiran tentang Sam Kauw dan Kabatinan goena lahir kita, toean Sie telah kirim lezingnja sebagi berikoet:

Lezing Toean Sie Sing Giok

Comite dari Sam Kauw Hwe di Tempeh.

Toean-toean, njonja-njonja dan nona-nona jang terqformat.

Lantaran saj poenja tempat ada berdjaohan dari sini, maka saja kirim sadja lezing ini, saja banjak harep toean-toean, njonja-njonja dan nona-nona anggep seperti saj dateng sendiri bikin pertemoean ini malem oentoek sama mengoereiken peladjarannja Sam Kauw jang memang tida bisa aken di sangkal lagi, ada peladjaran dan kasopanan jang aseli dari orang Tionghoa, dan soedah ampir tiga riboe taon lamanja itoe peladjaran dan kasopanan teroes terpake di tanah Tiongkok oleh sasoeatoe orang Tionghoa.

Nabi Khong Hoe Tjo poenja peladjaran tida koe-rang lengkepnja, dari oeroesan jang ketjil sampe jang paling besar, jaitoe dari oeroesan roemah-tangga, peladjaran, oeroesan negri dan oeroesan kabatinan, tentoe toean-toean, njonja-njonja dan nona-nona soedah banjak dapetken di dalem kitab-bitab Soetji dan dari itoe sari-sarinja jang tida bisa dibeli dengen harta-

Sabetoel-betoelnja kita orang Tionghoa soedah mempoenjai itoe lima sifat kabedjikan sama djoega langit dan boemi mempoenjai Ngo Heng. Itoe Djin

termasoek bagian *Bok* (kajoe), jaitoe *hati*. GIE termasoek bagian *Kim* (mas), jaitoe *peparoe*. LEE termasoek bagian *Hwee* (api), jaitoe *djantoeng*. TIE termasoek bagian *Swie* (aer), jaitoe *boeah pinggang*. SIN termasoek bagian *Touw* (tanah), jaitoe *limpa ketjil*. Dalem lima kabedjikan tida boleh satoe ada jang koerang, bisa ditiroeken dengen Ngo Heng dari langit dan boemi dan lima isi peroetnja manoesia. Apabila orang mengarti doenia tida boleh kakoerangan kajoe, kenapa manoesia bisa tida poenja DJIN (hati jang berkasiaan): orang jang tida poenja hati berkasiaan, nistjaja tida poenja pikiran aken pelihara, hatinja soedah moesna, tida beda dengen kajoe jang soedah bobo.

Apabila orang mengarti doenia tida boleh kakoerangan Mas, kenapa manoesia bisa tida mempoenjai GIE (kabaekan hati); orang jang hatinja tida baik, nistjaja tida mempoenjai pikiran hak kawadjiban, peparoenja soedah moesna, tida beda dengen mas jang bisa karatan atawa palsoe.

Apabila orang mengarti doenia tida boleh kakoerangan Api, kenapa manoesia bisa tida mempoenjai LEE (atoeran); orang jang tida poenja atoeran, nistjaja tida poenja roepa jang mentèrèng, djantoengnya soedah moesna, tida beda dengen api jang padem.

Apabila orang mengarti doenia tida boleh kakoerangan aer, kenapa manoesia kita tida mempoenjai TIE (kapinteran); orang jang bodo nistjaja tida poenja pikiran jang djernih, boeah pinggangnya soedah moesna, tida bedah sama djoega aer jang soeroet.

Apabila orang mengarti doenia tida boleh kakoerangan tanah, kenapa manoesia tida poenja SIN (kapertjaja'an); orang jang tida poenja kapertjaja'an nistjaja tida poenja boedi bergaoel, limpa ketjilnya soedah moesna, tida beda dengen tanah goegoer.

Orang haroeslah mempoenjai djantoeng lima kabedjikan, komoedian baroelah poenjai lima perwatesan

toeboeh. DJIN tida moesna, hawa hati terlahir; GIE tida moesna, hawa peparoe njaman; LEE tida moesna, hawa djantoeng terang; TIE tida moesna, hawa boeah pinggang moestadjab; SIN tida moesna, hawa limpa ketjil mendoesin.

Kebedijken memboengkoes toeboeh, toeboeh memboengkoes djantoeng; toeboeh digoenaaken oleh djantoeng, djantoeng menerangkan kebedijken; djantoeng jaitoe toeboeh, toeboeh jaitoe djantoeng, jang di seboet lima kabedijken dan lima perwatesannja manoesia. Manoesia jang hilang lima kabedijken sama dengen hilang badannja; manoesia jang leng-kep kebedijkannja baroe bisa toeroet tjampoer dengan langit dan boemi poenja *Ngo Heng*, jalah Sam Kauw poenja peladjaran dan oedjar jang dikembangken oleh Comite Sam Kauw Hwe Telokbetong, jang memang besar kebaekannja bagi manoesia jang hidoep.

Manoesia jang bisa djalanken itoe lima sifat namanya tinggal haroem sedari hidoep sampe matinja, berboekti dari Nabi Khong Hoe Tjoe, Lie Loo Tjoe dan Kwan Im Poo Sat, soedah beriboe-riboe taon, namanja terpoedji dan peladjarannja diperhatiken oleh orang segala bangsa sadalem ini doenia, maka Nabi Khong Hoe Tjoe bisa djadi saorang arif bidjasana dan boediman, kerna itoe lima sifat ada djadi akar-nja orang hidoep sampe matinja. Tjeng Tjoe jang terkenal paling pande ada djalanken itoe lima sifat, lantes Tjeng Tjoe lebih doeloe kamoekakeun toedjoean menjinta pada iboenja. Ada banjak lagi orang doeloe-kala jang ternama telah djalanken kabaktian penoeh pada kedoea orang toeanja, ada jang dahar makanan lezad tida loepaken orang toeanja, ada jang menangis meliat orang toeanja menggoenaken toengket kerna koeatir tenaganja soedah mendjadi koerang; ada jang berbakti dari djaoeoh dengan loekisken pa-toeng mirip dengan roepanja itoe orang toea.

Dengen berbakti baroelah bisa mempoenjai hati sajang pada orang jang berdjsa dan ternama; dengen berbakti baroelah bisa poenjaken hati tjinta negri. Dengen berbakti djadi memberi toeladan pada anak istri, apabila sang moeloet bisa mengomong berbakti, orang koedoe bisa mendjalanken, bila di loearnja sadja kaliatan berbakti pada Sam Kauw Hwee, boekan sadja orang menipoe dirinja sendiri, tapi menipoe djoega ajah boenda; boedi pekertinja berbakti tida ada boentoetnja, nanti malaikat di langit jang membales perboeatan dan kapalsoean itoe.

Orang jang tida perhatiken ini 5 sifat nasehat dari Nabi Agoeng Khong Hoe Tjoe, kabanjakan soedah tjari penghidoepan dan banjak memikoel kasangsaran, maka papatah Tionghoa ada bilang tentang Siauwdjin (orang rendah) artinja meloepaken 5 sifat. Saorang jang di kataken Siauwdjin soedah boekan manoesia jang di angen-angen meloeloe kadjhatan dan tamaha, laennja menandaken manoesia jang tida poenja maloe atawa paling rendah moreelnja.

Nabi Khong Hoe Tjoe, Dr. Sun Jat Sen jang di latiriken oleh iboe saorang miskin, komoedian Dr. Sun Jat Sen djadi persident, Khong Hoe Tjoe mendjadi orang jang termoelja dalem doenia, itoe semoea jang terjadi menoeroet prentahnja Toehan, tentoe Toehan lantas membantoe; jang terjadi melawan Toehan, tentoe Toehan tida accoord pada manoesia.

Doenia ada moentjooel persoedara'an, persobatan dan pengatelan, adanja soeal soeami istri, doenia diadi berisi penneh dengen manoesia, dimana lantas ada dilaksenken gelattoeran prikamanoesia'an dan di-ibarat-ken langit dari boemi, boekannja sadja dari iboe dan bapa dari manoesia, tapi ada sabagi iboe dan bapa dari sekalian benda di dalem doenia. Nabi Khong Tjoe bilang: belon perna liat orang jang bener-bener steka sama kebaikan dan bentji kedjahatan; kaloe

Tentang Agama.

Pidatonja Mej. Lily Ang, dalem pertemoean dari Sam Kauw Hwe Tempeh tanggal 25-7-'36.

Disini saja maoe bikin sedikit peroendingan soeal agama dan kaloe salah moehoen dima'afken.

Agama adalah itoe pokok dasar aken kita menoe-djoe dan bersatoe pada Toehan, kerna hidoeper kita dan semoea machloek ada berasal dan dapat kakoeatan dari Toehan.

Apakah artinja Agama?

Agama ada laksana aer djernih jang kapan kita minoem aken djadi slamet, sebab aer jang djernih tida mengandoeng kotoran dan koetoe-koetoe penjakit jang bisa membikin roesakna kita poenja badan. Aken tetapi itoe aer kita koedoe djaga dengan hati-hati dan toetoepin jang baek, agar tida sampe kamasoekan kotoran. Artinja djikaloe soedah menoedjoe ka agama kita koedoe taoe pada patokannja.

Agama ada sabagi pakean dari kita poenja batin goena mengadep pada Toehan dan membersihken hidoeper kita sampe djadi bening.

Djikaloe kita soedah bisa soetjiken batin, maski kita tida berdjalanan pergi aken mentjari atawa mengedjer, kita poen bisa sampe ka itoe tempat jang ditoedjoeken.

betoel soeka kebaekan, tentoe ia anggep kebaekan ada paling atas dari segalanja. Kaloe bentji sama kedjahatan, tentoe ia djalanken kebedijken, dan segala apa jang djahat tida boleh deket pada dirinja.“

Sampe di sini sadja saja poenja lezing, dengan membilang trima kasih pada sekalian Comite Sam Kauw Hwee jang soedah begitoe sympathie aken toentoen soedara-soedara lelaki dan prampoean jang masih kebanjakan di dalem kagelapan aken dianter ka djalanan jang terang. Dan kita seroeken biarlah semoea soedara-soedara nanti soeka dateng ka gedong Sam Kauw Hwee lebih djaoeh.

Boeah pakerdja'annja Sam Kauw Hwe Tempeh.

Pada tanggal 17 Juli sekola Tiong Hoa Hak Hauw Tempeh soedah dipindah ka gedong Sam Kauw Hwe, dan menjadi S. K. H. poenja salah-satoe afdeeling jang teroetama. Ini pemindahan telah dirajaken dengan officieel, dan maskipoen diatcer serba saderhana, tapi dapet djoega perhatian dari publiek, apalagi pada waktoe malemnja, boleh dibilang gedong pakkoempoelan menjadi padet dengen tetamoe lelaki dan prampoean. Muziek Sam Kauw Hwe jang dipimpin oleh Toean Kwee Tik Giang poen telah bantoe merameken.

Pagi djam 8—11 sekalian tetamoe dan anak-anak moerid sasoedah diambil fotonja lantes mengadep memberi hormat di hadepan gambar Dr. Sun Yat Sen, samentara muziek maenken lagoe kabangsa'an.

Komoedian Toean The Soen Tjing, sabagi wakil voorzitter, atas nama bestuur Sam Kauw Hwe menghatoerken slamet dateng pada semoea jang hadlir, dan komoedian telah bitjara djoega Toean-toean Liem Kim Giok, Oei Kiem Sing, Tan Kok Hiang (goeroe T. H. H. H., dalem bahasa Tjeng Im) dan Miss Tan (Djoega Goeroe T. H. H. H.) jang Melajoe-ken bitjaranja Goeroe Tan, dan komoedian ia sendiri berpida-to dalem bahasa Tjeng Im. Komoedian tetamoe-tetamoe didjamoe thee dan koewe-koewe.

Sorenja djam 4 telah diadaken perlandingan antara Sam Kauw Hwee poenja Afdeeling basket-ball melawan team dari Loemadjang.

Malemnja djam 8,30 pertemoean dilandjoetken kombali. Pertama naek di podium berbareng tiga orang jang meroepaken symbool dari „Sam Kauw“ jaitoe toeantoean Liem Bian Ik, Liem Kiem Giok dan Ong Loo Bing, jaitoe Voorzitter dengen diapit oleh doeae adviseur. Disitoe Toean Liem Kiem Giok selakoe voorzit-

SAM KAUW GWAT PO No. 24.

ter, sasoedah memberi slamet dateng pada sekalian jang hadlir, laloe membitjaraken kapentingannja onderwijs, dan lebih djaoe menerangken bahoea toedjoean dari Sam Kauw Hwe, selanjutnya memperbaiki moraal, pada bagian lahir hendak mengatoer djoega jang menjadi kabaekannja penghidoepan di ini masa.

Komoedian disilahkan laen-laen orang berpidato dengan bergilir, maksoednya aken kasih soemangget soepaja ini gerakan bisa madjoe dan berhatsil. Orang-orang jang bitjara ada Toean-toean Phwa Siang Hong dari Loemadjang dalem bahasa Hokkian ; Tjan Hwie Djian, Oei Siong Gwan, dari Loemadjang ; R Prawiroatmodjo dari Loemadjang, tetoea Theosofie dan satoe-satoenja orang Indonesier jang betoel-betoel taro sympathie pada Sam Kauw Hwe, dan sering memberi nasehat-nasehat dan pembitjara'an jang berharga. Laen dari itoe soedah bitjara djoega Toean-toean Liem Bian Ik, Oei Kiem Sing dan The Soen Tjing.

Sasoedah slese orang-orang berpidato, tetamoe-tetamoe berkoempoel di roeangan loear aken doe-doeck mendengerin muziek dengen minoen limonade dan dahar roti. Sampe djam 11 peraja'an ditoetoep dengan beres.

Bestuur Sam Kauw Hwee Tempeh telah dirobah seperti berikoet :

Voorzitter : Liem Kiem Giok.

Vice Voorzitter : Tan Tong Liep.

Secretaris : Liem Kiong Tjiauw.

Adjunct Secretaris : Liem Sian le.

Penningmeester : Liem Kiem Hian.

Hoofdcommissaris : Liem Kiem Jong.

Adviseur : Liem Sien Poe, Liem Bian Ik, Ong Loo Bing.

Commissaris Looper : Liem Ing Liat, Liem Boen Soe.

Leider Lezing : The Soen Tjing, Liem Bian Ik, Ong Loo Bing dan Oei Kiem Sing.

BATAVIA BUDDHIST ASSOCIATION DAN SAM
KAUW HWE BATAVIA.

Di bawah ini ada tjetetan dari lezing-lezing jang dibikin paling blakang dalem Klementeng Kwan Im Tong, Batavia :

13 Aug. R. Soekirlan : Peladjaran dari Krishnamurti.

20 Aug. Kwee Tek Hoaij : Mentjari Katentreman Hidoep (II).

SOEDAH AMPIR KLAAR DITJITAK!
PERTENGAHAN SEPTEMBER TENTOE SEDIA!

Serie Kaampat dari

„Omong-omong tentang Agama
Buddha“.

Isinja :

SOEAL REINCARNATIE DAN KARMA,
TENTANG TIDA ADANJA ALLAH.

Maski ini boekoe tjoemah berisi doea peroendingan, tetapi doea-doea ada bagian jang amat penting dan berharga dari peladjaran Buddha, dan ini ada boea pertama kalih diroendingken tentang „Tida Adanja Allah“ satjara tjingli dan teroes terang.

Isinja ada 150 pagina formaat ketjil.

Harga per djilid tjoemah f 0,30.

Abonne ini maandblad boleh traoesah kirim oewang dimoeka.

Siapa hendak pesen boleh kasih kabar dari sekarang sogaaja begitoe lekas sedia bisa lantes dikirim.

BOEKHANDEL „MOESTIKA“
Tjitjoeroeg (Preanger).

Penghidoepan di sablah sananja Koeboer.

Memberi keterangan apa jang manoesia akan alamken di acherat pada sasoedahnja meninggal doenia, dan apa artinja „mati“, menoeroet pendapatan dari Njonja Blavatsky. Dr. Njonja Annie Besant Bisschop Leadbeater dan laen-laen achli occult.

DIBITJARAKEN OLEH
KWEE TEK HOAIJ.

Tebelnja 120 pagina format 13X22 cM. dengen kertas aloes dan tjitakannja terang dan rapih. Didjilid doea matjem :

Dalem djilidan biasa f 1,50.

Pake carton tebel terdjaat benang dengen omslag indah f 2,00.

Kaloe maoe minta dikirim aangeteekend tambah f 0,20.

Abonne ini maadblad traoesah kirim oewang di moeka.

Boekhandel „Moestika“.

TJITJOEROEG, (PREANGER).